



Q A R O R  
Р Е Ш Е Н И Е

2020 yil «2» mart 129 -son

**Ўзбекистон Республикаси Вазирлар Маҳкамасининг 2020 йил  
20 февралдаги 104-сонли қарори тўғрисида**

Ўзбекистон Республикаси Вазирлар Маҳкамасининг 2020 йил 20 февралдаги “Ташқи реклама бозорини тартибга солиш тўғрисида”ги 104-сонли қарори ижросини таъминлаш мақсадида

**Қ А Р О Р Қ И Л А М А Н:**

1. Ўзбекистон Республикаси Вазирлар Маҳкамасининг 2020 йил 20 февралдаги “Ташқи реклама бозорини тартибга солиш тўғрисида”ги 104-сонли қарори раҳбарлик ва ижро учун қабул қилинсин.

2. Вазирлар Маҳкамасининг мазкур Қарори билан тасдиқланган қуйидаги: Ташқи реклама объектларини (конструкцияларини) қуриш тартиби тўғрисидаги низом;

Ташқи реклама объектларини (конструкцияларини) қуриш учун бериладиган ер участкалари, давлат мулки бўлган бино ва иншоотлар рўйхатини шакллантириш тартиби тўғрисидаги низом;

Ташқи реклама объектларини (конструкцияларини) ер участкалари, давлат мулки бўлган бино ва иншоотларда қуриш ҳуқуқини электрон аукцион орқали бериш тартиби тўғрисидаги низом;

Ўрнатилган ташқи реклама объектлари (конструкциялари) учун тўловлар миқдорини аниқлаш тартиби тўғрисидаги низом;

Ташқи реклама объектлари (конструкциялари) хавфсизлигининг умумий техник регламенти ижро учун қабул қилинсин.

3. Белгилансинки,

а) мазкур қарор қабул қилингунга қадар қонун ҳужжатларига мувофиқ ташқи реклама объектларини (конструкцияларини) ўрнатиш учун тузилган шартномалар, берилган паспортлар, сертификатлар, рухсатномалар ва ҳуқуқни белгиловчи бошқа ҳужжатларнинг амал қилишини узайтириш:

ер участкаларидаги ташқи реклама объектлари (конструкциялари) учун 10 йил муддатга, давлат мулки бўлган бино ва иншоотлардаги ташқи реклама объектлари (конструкциялари) учун 5 йил муддатга Давлат хизматлари марказлари орқали реклама жойлари паспортларини бериш;

Ўрнатилган ташқи реклама объектлари (конструкциялари) учун тўловлар миқдорини аниқлаш тартиби тўғрисидаги низомга 2-иловада кўрсатиб ўтилган бир марталик йиғим суммасини тўлаш орқали амалга оширилади ҳамда ушбу маблағлар бир йил давомида ҳар ой тенг тақсимланган ҳолда туманлар (шаҳарлар) маҳаллий бюджетига ўтказилади;

б) қалбакилаштирилган ҳужжатлардан фойдаланилган ҳолда ташқи реклама объектларига (конструкцияларига) олинган паспортлар, гувоҳномалар, рухсатномалар ва ҳуқуқни белгиловчи бошқа ҳужжатлар муддатини узайтиришга рухсат берилмайди ва улар ҳақиқий эмас деб ҳисобланади;

в) ер участкаларига ўрнатилган видео экранли ташқи реклама объектлари (конструкциялари) учун ушбу банднинг “а” кичик бандида кўрсатилган муддат қўшимча равишда 10 йилга узайтирилади;

г) ер участкаларига ўрнатилган видео экранли ташқи реклама объектига (конструкциясига) ташқи рекламани жойлаштириш ҳуқуқи учун маҳаллий давлат ҳокимияти органлари томонидан белгиланадиган йиғим миқдорига 0,5 коэффицент қўлланилади;

д) миллий байрамлар, хорижий давлатлар раҳбарларининг давлат ташрифлари ва бошқа давлат тадбирларига оид ахборот ташқи реклама объектларида (конструкцияларида) жойлаштирилганда, ташқи рекламани жойлаштириш ҳуқуқи учун ойлик йиғим миқдори тегишли ҳокимлик қарорига биноан жойлаштирилган кунларга мутаносиб равишда камайтирилади;

е) ушбу қарор қабул қилингунга қадар қонуний равишда ўрнатилган барча ташқи реклама объектларини (конструкцияларини) мазкур қарор талабларига мослаштириш учун мазкур қарор қабул қилинган санадан бошлаб олти ой муддат берилади ва шу муддатда белгиланган талабларга мослаштирилмаган реклама объектлари (конструкциялари) уларнинг эгалари томонидан ихтиёрий равишда ўз кучи билан олиб ташланади (демонтаж қилинади) ҳамда ер майдони тартибга келтирилади, акс ҳолда қурилмалар тегишли ҳокимлик томонидан демонтаж қилинади ва ҳокимлик тасарруфига ўтказилади;

ж) мазкур қарор талабларига мувофиқ ҳолда битта реклама жойида бир нечта ташқи реклама объектлари (конструкциялари) қурилганлиги ва улар турли тадбиркорлик субъектларига тегишлилиги аниқланган тақдирда ушбу жойда ташқи реклама объектларини (конструкцияларини) қуриш ҳуқуқи электрон аукцион орқали қайта берилади.

4. Қурилиш бош бошқармаси туманлар (шаҳарлар) ҳокимликлари билан биргаликда Тошкент шаҳрида ташқи рекламани жойлаштириш соҳасидаги фаолиятнинг алоҳида тартибини амалга ошириш яқунлари бўйича 2021 йил 1 январга қадар бўлган муддатда Ўзбекистон Республикаси Вазирлар Маҳкамасининг 2020 йил 20 февралдаги “Ташқи реклама бозорини тартибга солиш тўғрисида”ги 104-сонли қарорининг 3-банди нормаларини янада такомиллаштириш ва уни Тошкент вилоятида қўллаш юзасидан вилоят ҳокимлигига таклифлар киритсин.

5. Ўзбекистон Республикаси Вазирлар Маҳкамасининг 2020 йил 20 февралдаги “Ташқи реклама бозорини тартибга солиш тўғрисида”ги 104-сонли қарори ижросини вилоят ҳудудида таъминлаш юзасидан 1-иловага мувофиқ махсус ишчи комиссия тасдиқлансин.

6. Туман (шаҳар) ҳокимликлари:

3 кунлик муддатда Ўзбекистон Республикаси Вазирлар Маҳкамаси ва вилоят ҳокимлигининг мазкур қарорини ижрога қабул қилиш юзасидан туман (шаҳар) ҳокимлари қарорини қабул қилишни;

10 кунлик муддатда ташқи реклама объектларида (конструкцияларида) ташқи рекламани жойлаштириш (тарқатиш) ҳуқуқи учун табақалаштирилган йиғимлар миқдорини ишлаб чиқилишини ҳамда Халқ депутатлари туман ва шаҳар Кенгашлари сессиясига кўриб чиқилишини;

15 кунлик муддатда ташқи реклама объектларини (конструкцияларини) қуриш учун бериладиган ер участкаларини ҳамда давлат мулки бўлган бино ва иншоотларни аниқлаш мақсадида ҳудудларни ўрганишни;

15 кунлик муддатда ташқи реклама объектларини (конструкцияларини) жойлаштириш учун ер участкасидан фойдаланиш ҳуқуқини, шунингдек, давлат мулки бўлган бино ва иншоотларга реклама объектларини жойлаштириш ҳуқуқини белгилайдиган ҳужжатлар тайёрланишини;

ташқи реклама объектларини (конструкцияларини) тизимли мониторинг қилиш ва уларни ноқонуний жойлаштириш ҳолатларини аниқлашни;

ташқи реклама объектларида (конструкцияларида) жойлаштирилган рекламалар, шу жумладан ижтимоий рекламалар ҳисобини юритишни;

йўлнинг қатнов қисмида жойлашган аҳоли турар-жой биноларининг ташқи қисмида (балкон, лоджия, дераза, эшик ва бошқа тарафларига) ҳар қандай турдаги шахсий эълонларни жойлаштирилишига йўл қўймаслик чораларини кўришни;

ушбу соҳада аниқланган қонунбузарлик ҳолатлари бўйича тегишли чора кўриш учун ҳар ойнинг 5 санасига Ўзбекистон Республикаси Монополияга қарши курашиш қўмитасининг Тошкент вилояти ҳудудий бошқармасига таклифлар киритишни таъминласинлар.

7. Туман (шаҳар) ҳокимликлари, Прокуратура ва Ички ишлар органлари, Монополияга қарши курашиш ҳудудий бошқармаси, Солиқ бошқармаси, Маданият бошқармаси, Қурилиш бош бошқармаси, Туризмни ривожлантириш бошқармаси, Автомобил йўллар бошқармаси, Транспорт бошқармаси, Экология ва атроф - муҳитни муҳофаза қилиш бошқармаси, Маҳалла ва оилани қўллаб-қувватлаш бошқармаси, Савдо-саноат бошқармаси, “Тасвирий ойна” ижодий уюшмасининг вилоят бўлими, ташқи реклама операторлари манфаатларини ифода этувчи нодавлат ноижорат ташкилотлари ва бошқа манфаатдор ташкилотлар билан биргаликда:

2-иловага асосан ҳар бир туман (шаҳар) бўйича махсус ишчи гуруҳлар (кейинги ўринларда махсус ишчи гуруҳлар деб аталади) тузган ҳолда барча турдаги ташқи реклама объектларини (конструкцияларини) 15 кун муддатда ушбу қарор талабларига мувофиқлиги юзасидан хатловдан ўтказишни;

ташқи реклама объектлари (конструкциялари) эгаларига ушбу қарор талабларига жавоб бермайдиган ҳолатларни ушбу қарор қабул қилинган санадан бошлаб олти ой ичида бартараф этиш тўғрисида кўрсатмалар беришни;

хатлов натижалари бўйича жойлаштирилган ташқи реклама объектларининг (конструкцияларининг) ушбу қарор талабларига мувофиқлиги тўғрисида хулосалар (кейинги ўринларда хулоса деб аталади) берилишини;

ушбу қарор қабул қилинганга қадар ташқи реклама объектларига (конструкцияларига) қалбакилаштирилган ҳужжатлардан фойдаланилган ҳолда олинган паспортлар, гувоҳномалар, рухсатномалар ва ҳуқуқни белгиловчи бошқа ҳужжатларни ўн календарь кун ичида бекор қилишни;

ташқи реклама объектларини (конструкцияларини) жойлаштириш учун паспортлари, сертификатлари, рухсатномалари ва ҳуқуқни белгиловчи бошқа ҳужжатлари бекор қилинган ёки ушбу ҳужжатлар мавжуд бўлмаган (рухсатсиз ўрнатилган) ташқи реклама объектларини (конструкцияларини) ўттиз календарь кун ичида демонтаж қилиш бўйича зарур чоралар кўришни таъминласин.

Туман (шаҳар) ҳокимликлари 15 кунлик муддатда ишчи гуруҳлар томонидан амалга оширилган ишлар ва маъмурий ҳудудда ташқи рекламани жойлаштиришни тартибга солиш бўйича кўрилган чора-тадбирлар натижалари тўғрисида вилоят ҳокимлигига батафсил ахборот киритилишини таъминласин.

#### 8. Шундай тартиб ўрнатилсинки, унга мувофиқ:

автомобиль йўлларининг ажратувчи бўлагида, хусусан йўлнинг ёнма-ён жойлашган қатнов қисмларини ажратувчи, транспорт воситалари ҳаракатланиши ёки тўхташи учун мўлжалланмаган, йўл сатҳидан баланд ва (ёки) ётиқ чизиги билан белгиланган қисмида ҳамда тротуар ва пиёдалар йўлкаларида, хавфсизлик оролчаларида ташқи реклама объектларини (конструкцияларини) ўрнатиш тақиқланади, айланма ҳаракатланишли чорраҳалардаги хавфсизлик оролчалари бундан мустасно;

хулоса фақат жойлаштирилган ташқи реклама объектлари (конструкциялари) ушбу қарор талабларига тўлиқ мос келганда ҳамда улар бўйича тегишли кўрсатмага мувофиқ аввал аниқланган қоидабузарликлар бартараф этилган тақдирда берилади;

хулоса Давлат хизматлари марказлари орқали реклама жойининг паспортини олиш учун асос бўлади;

махсус ишчи гуруҳ аъзолари бериладиган хулосаларнинг қонунийлиги ва ишончлилиги, шунингдек, ташқи реклама объектлари (конструкциялари) паспортлари, гувоҳномалари, рухсатномалари ва ҳуқуқни белгиловчи бошқа ҳужжатларни бекор қилиш тўғрисидаги материалларни ўз вақтида вилоят ҳокимлигига тақдим этилиши учун шахсан жавобгардир;

ташқи реклама объектлари (конструкциялари) эгалари махсус ишчи гуруҳларнинг хулосалари ҳамда туман (шаҳар) ҳокимликларининг ташқи реклама объектлари (конструкциялари) паспортлари, гувоҳномалари, рухсатномалари ва ҳуқуқни белгиловчи бошқа ҳужжатларни бекор қилиш тўғрисидаги қарорлари устидан суд тартибида шикоят бериш ҳуқуқига эгадирлар;

туман (шаҳар) ҳокимликлари махсус ишчи гуруҳлар томонидан тузилган хулосалар асосида ҳудудлар бўйича ташқи реклама объектларининг (конструкцияларининг) маълумотлар базасини шакллантиради;

Қурилиш бош бошқармаси туман (шаҳар) ҳокимликлари томонидан тақдим этилган маълумотлар асосида Ташқи реклама объектларининг (конструкцияларининг) ягона электрон реестрини шакллантиради ва ўзининг расмий веб-сайтига жойлаштиради.

9. Вилоят молия бош бошқармаси ташқи рекламани жойлаштириш ҳуқуқи учун ойлик йиғимлар суммалари, ўрнатилган ташқи реклама объектлари (конструкциялари) учун реклама жойлари паспортларини беришдан тушадиган маблағлар, шунингдек, ташқи реклама объектларини (конструкцияларини) қуриш ҳуқуқи учун электрон аукцион яқунлари бўйича маблағлар тушиши учун 5 (беш) иш кунда туманлар (шаҳарлар) ҳокимликларига шахсий ғазна ҳисобварақларини очсин.

10. Тошкент вилояти ҳокимининг 2002 йил 26 июндаги “Тошкент вилоятида ташқи рекламани ва транспорт воситаларида рекламани жойлаштириш тартиби тўғрисида”ги 134-сонли ва 2003 йил 13 августдаги “Вилоят ҳудудида ташқи рекламани жойлаштириш юзасидаги қўшимча чоратadbирлар тўғрисида”ги 160-сонли қарорлари бекор қилинсин.

11. Вилоят ҳокимлиги матбуот котиби (Кабулов), вилоят матбуот ва ахборот бошқармаси (Эралиева) ҳамда “Тошкент ҳақиқати” ва “Ташкентская правда” газеталарига ушбу қарорнинг мазмуни ва моҳиятини оммавий ахборот воситаларида ёритиш тавсия этилсин.

12. Вилоят ҳокимининг тегишли ва соҳалар бўйича ўринбосарлари, тегишли бошқарма ва ташкилот раҳбарлари, туман ва шаҳарлар ҳокимларининг зиммасига – юқоридаги қарор билан тасдиқланган низомларда белгиланган талаблардан келиб чиқиб, тегишлилиги бўйича вазифа ва топшириқларни муддатларида сифатли таъминлаб борсинлар.

13. Ушбу қарорнинг бажарилишини назорат қилиш вилоят ҳокимининг ўринбосарлари (Б.Муллаханов, Д.Абдусаламов, Ш.Ҳакимов) зиммасига юклатилсин.

Вилоят ҳокими



Р.Холматов